



職方典等一千五十卷

泉州府部彙考六

泉州府風俗考

府志

府總

泉屬封疆逼狹物產磽瘠桑蠶不登于筐繭田畝不足于耕耘稻米菽麥絲纈綿絮之類皆仰資吳浙惟魚蝦蠃蛤之利稍稍稱饒山藪居民樹藝葛苧機杼所就與他邑相灌輸而貿易魚鹽不過饗殮是賴地利薄故其蓄聚少俗尙敦朴諸詣壘塾市肆者踽踽一布袍士以素庶人以緇冬夏迭更故四民各修其本業居恆絕不爲宴集儉勤瞿瞷有唐風蟋蟀之意耕織力本有豳風七月之意守經講禮有洙泗斷斷之意若晉江人文甲於諸邑石湖安平番舶去處大半市易上國及諸島夷稍習機利不能如山谷淳朴矣南安文教爲盛其巨姓亦最多意氣惟長民者常於衙蠹費清理焉惠俗節節嗇人知力學攻苦文辭未聞有鬻訟以罹罰者故至今亦稱易治同爲朱子過化之邦弦誦之聲四達科第近埒于晉邑其迤西近漳者性頗悍勁然義

氣真率亦一快也大都附郡南惠同三邑田土山海參半俗相近安溪永春德化盤紆山谷間
嵐瘴最重早起蒸霧四合人如坐甌中村落迷失八九月多發瘧疾其去城市遠耕織外一無
所事儒碩亦斌斌繼出然多世居都會不與巢居崖處者爲鄰矣吉凶儀節多依朱子家禮七
邑同風但感于郭璞葬經遞相肄習苟冀牛眠白鶴之祥急則牙角交搆緩則遷延歲月雖再
世不葬恬然安之此近俗之不古者也歲時之節如元夕張燈端午競渡中秋玩月惟時和年
豐家給人足聊以自相懽娛而裝飾神像窮極珍貝闔遊衢路因起爭端猶醺錢置酒互相鼓
動日昏酣而不知止此何爲者是在長民者能善道之耳

泉州府祠廟考

府縣志合載

本府 晉江縣附郭

社稷壇在城西北六里許

山川壇在城西南臨漳門外龜山洪武二年知府常性建

城隍廟先在泉州府西察院之旁嘉靖三十二年改爲叅將府而改資壽寺爲城隍廟太守童

漢臣建

厲壇在城北七里許洪武二年知府常性建嘉靖間遷于城之東北

旗纛廟

洪武初立 忠孝祠在府學禮殿之西宋真文忠公建成化十年知府徐源重修後迺廢之

今仍存故事如前 王刺史祠在崇陽門樓祀刺史王公潮 朱文公祠在泉山書院下

王梅溪祠在行春門外祀宋郡守王十朋 真西山祠在行春門外祀宋郡守真德秀

蔡忠惠祠在郡東洛陽橋南祀宋郡守蔡襄 衛民祠祀郡守熊尙 韓魏公祠在城隍

廟右祀宋郡守韓國華及子魏國忠獻公琦祠舊在郡治移建于此 姜鳳阿祠在開元寺

西廊之北 莊方塘祠在承天寺之右 忠勇祠在仁風門內街北 關王廟在郡城

通淮街北郡人奉之特盛廟有左右堂萬曆四十年復塑三義諸葛武侯像並祀於廟堂之右

元帝廟在郡城東南石頭山廟枕山漱海人烟輳集其下宋時爲郡守望祭海神之所

南安縣

社稷壇在縣前姜相峯前 山川壇在縣東鵬溪北俱洪武初知縣王罕建 厲壇在縣

北一里許洪武初知縣王罕建成化十九年知縣陳廷忠重修 城隍廟在縣治東宋時建

洪武弘治間知縣劉祥黃濟重建 朱文公祠在儒學明倫堂左

惠安縣

社稷壇在縣治北一里

山川壇在縣南一里許知縣高顯建今移南門外後樂亭西北

城隍廟在縣治東宋天聖中知縣李畋建詳具宣蹟傳洪武六年知縣高顯重建

厲壇在

縣北二里知縣羅泰建

朱文公祠在社稷壇北

襄惠祠在山川壇前祀都御史張襄

惠公岳

林公祠在縣治南門內祀惠安死事知縣林公咸

王中丞祠在儒學朱文公

祠之右祀巡撫王公忬

青山靈應廟在二十六都神姓張名栢閩時嘗營青山下以禦海

寇宋建炎間海寇作神有陰助功聞于朝賜額誠應

鳳山通靈廟在二十一都之鳳山三

國吳時有將軍及妻葬於此山常有雲霞覆其上居民祈禳皆應立廟江濱祀之一夜雷雨大

作廟忽自移山下宋淳熙間海寇入界神所居前後常聞鑼鼓聲旗幟羅列賊不敢犯聞于朝

封順濟侯

濟陽蔡兵馬廟在十都吳山南神諱鎬莆人仕梁爲兵馬使擊賊有功沒葬大

鄉澳之西山鄉人祀之

靈應廟在十都廟有二像曰監倉陳公國忠曰青嶼鄭公濟時皆

光州固始人避地入閩遂居焉歿而廟食宋紹定間海潮暴溢民居盡沒惟廟獨存淳祐六年

賜今額

大蚶廟在十一都海濱昔海濤洶湧有物輪囷高大如屋乘潮而至鄉人異之爲

立廟

昭惠廟在萬安橋北蔡忠惠作橋時卽建是廟以奉香火

德化縣

社稷壇在縣治西洪武六年知縣王巽建三十一年圯于水

山川壇在龍濟橋南亦圯于

水俱主簿古彥輝建

城隍廟在縣治西洪武六年知縣王巽建宣德嘉靖年間知縣何復

胡呈章各重建

厲壇在縣北妙峯山麓洪武六年知縣王巽建十三年知縣王貞復拓而

廣之嘉靖十年知縣許仁遷于西北

東嶽廟在龍潯山麓宋嘉熙己亥建宣德間何復重

新

忠應廟在縣歸化里卽顏長官祠二神一姓莊名賦桃源人紹定間有驅寇功一姓鄭

名昭祖邑人有惠愛於鄉故並祀之

英顯廟在湯泉上團神諱莫烈宋紹定三年以捍汀

寇功賜今額

小尤廟在小尤上團二神一姓章一姓林唐末避黃巢之亂居此歿而有靈

鄉人祠之

安溪縣

社稷壇在縣治西北

山川壇在縣治西南俱正統成化間知縣路亨方汝榮重修二壇皆

知縣陳綵於嘉靖四十一年變賣與民知縣蔡常毓擇地未建

城隍廟在縣治東南唐保

大中建成化間知縣谷廷怡吳英相繼修建嘉靖年間知縣殷榮重建嘉靖之季燬于倭未建
厲壇在縣治北正統間知縣路亨成化間知縣方汝榮相繼重修嘉靖四十一年知縣陳綵變
賣與民四十四年知縣蔡常毓仍擇城北壇壝未建 詹公祠在縣治鼓樓內東偏祀始創

縣治詹公敦仁

同安縣

社稷壇在慶豐門外

山川壇在厚德門外

城隍廟在縣治東皆洪武初建燬于寇成

化間皆知縣張遜重建

厲壇在拱辰門外洪武間建成化戊戌知縣張遜重建正統元年

知縣李彰重修

蘇魏公祠在儒學教思堂後朱文公建以祀故將蘇公頌自爲記

朱

文公祠在儒學之東

東嶽行廟在城東二里許官路之北

慈濟廟在縣西南積善里

之白礁神姓吳名本世住白礁平生醫灸濟人明驗如神及卒鄉人祀之

馬牧王廟在翔

風里十九都其人陳姓唐時牧馬翔風之山馬日蕃人買馬輒以馬贈及過江僅所買之馬在人以爲神及卒鄉人祀之 豪山廟在馬鞍山之麓朱文公真西山祈雨于此輒應成化戊

申夏旱尹張遜修二先生故事甘雨立至重修其廟

永春縣

社稷壇在縣西北

山川壇在縣西南俱洪武六年知縣蔡暹建嘉靖三年知縣柴鑣重修

城隍廟舊在丞廳左後遷桃源驛東宋慶元六年災知縣林敞梁恂重建正德十四年知縣楊太古續建堂廊規制始備 厲壇在縣東北洪武六年知縣蔡暹建嘉靖三年知縣柴鑣重

建

朱文公祠語具規制志書院下嘉靖末年燬于賊尙未重建

義烈祠在縣西二十

五都官田市嘉靖四年知縣柴鑣建以祀嘉靖元年二年三年殺賊陣亡義士尤新五等三十
四人詳具武衛志嘉靖三十九年祠燬于倭寇仍有故事如前 樂山廣福廟在十五都其

神甚靈響俗敬祀之宋嘉定中歲大旱郡守蔡襄禱雨有應以狀聞封善利王尋加廣福

留廂使廟廟之神爲光州固始人名失傳生梁乾化間石晉永隆四年補廂使團練次年契丹

犯闕神避地桃林既歿有靈鄉人立廟祀焉

石鼓祠在縣西二十三都宋紹興二十五年

邑令黃瑀建祠瞰溪溪心有石如鼓相傳能鳴雨鳴則晴旱鳴則雨雨旱禱之輒應故名

龍潭祠在十四都龍潭上先是閩王審知使袁昭以兵鎮桃林既卒鄉人卽其山立祠祀之

東臺僊祠祠之神爲光州人名失傳初從王潮入閩爲奮威將軍統戍桃林因家焉歿顯其靈以衛鄉井因祀之

寺觀附

本府

晉江縣附郭

開元寺在肅清門外唐之城西門外也邑長者黃守恭晝夢有僧欲化其宅爲寺守恭曰待桑樹生蓮花乃可耳不數日桑樹盡生蓮花守恭神之卽捨爲寺初名蓮花寺唐開元二十六年令天下佛寺皆名開元遂改今額元至正間災洪武初重建佛殿永樂戊子再增廣之寺有東西二塔東塔號鎮國唐咸通六年文僊禪師作木塔九層宋天禧中改十三層紹興中改木爲磚高七層嘉熙二年本供禪師易磚爲石僅一層法權繼之造四層天錫成之作五層淳祐十

年完其上合尖有鐵香爐銅寶蓋鍍金銅葫蘆塔八角以鐵索鉤之每層中爲塔心外遠以簷廊護以石欄廣圍圓一十七丈二尺高十九丈三尺五寸西塔號仁壽五代梁貞明二年建初閩王審知於都督府造木塔七層塔成而沉地湧出泉審知夢應在泉州遂以木植浮海至泉建塔號無量壽塔宋紹興中火改造磚塔寶慶中始爲石塔比東塔工巧相似海內以爲壯觀萬曆丁酉守恭裔孫參政黃文炳修正殿法堂及兩廊三十二年地震東塔頂蓋石角折邑人詹仰鳩財修之三十四年大風西塔葫蘆壞大學士李廷機鳩財命修之 承天寺在崇陽

門內唐天祐中王延彬始創福先招慶院於北山後燬于兵留從効乃以別墅爲寺號南禪宋景德間賜名承天元末兵火鮮有存者洪武初僧原輔建佛殿道陵建法堂東西二經藏智莊建輪藏及三門永樂甲午建羅漢堂丁酉建山門己未佛殿兩廊輪藏俱火于客兵庚申重建佛殿萬曆二十四年重修東西廊及佛殿阿難迦葉金身 崇福寺在城內東北隅相傳寺

故在城外陳洪進有女出家拓羅城包之名千佛庵元祐六年改崇福今廢 光孝寺在郡

城東南隅宋崇寧二年郡守潘珪奉詔以南草場廢地建初名崇寧寺紹興十年改光孝寺嘉

靖三十八年移入承天寺右畔萬曆己丑重建壬子年僧廣通重建法堂

水陸寺在肅清

門外西南唐天寶六年置放生池建水陸堂其上後廣爲院嘉祐中郡守蔡襄改爲寺南外宗正司在焉蒲壽庚據泉盡殺南外宗室至元復建爲寺今廢

資壽寺在行春門外北隅俗

呼北藏寺宋初陳洪鋁建爲兄洪進祈壽故名資壽嘉靖間改爲城隍廟

東禪寺在仁風

門外東湖畔唐乾符中市蔡耽之宅構菴至廣明元年改名東禪今廢

法石寺在通淮門

外萬歲山陳洪進葬妻及女于此山之岡旋建寺乾德賜名法石今廢

安福寺在三十三

都龍首山下唐垂拱間建今廢

保福寺在三十三都唐保大間建今廢

廣教寺在臨

漳門外留鄂公建宋改廣教今廢

法雲寺在青陽山唐天祐間刺史王延彬建今廢

普照寺在靈應山下唐天祐間建今廢

方廣寺在七都五代時建今廢

空相寺在靈

秀峯下後梁開平中建今廢

杉植院唐咸通間建

禪悅寺元至正間僧自得建今廢

泰嘉寺在北山阿宋紹興間僧靈源建庵于此明洪武初改爲寺今廢

清淨寺在郡城通

淮街北宋紹興間回人茲喜魯丁自撒等來泉所造樓塔高敞相傳爲文廟青龍之左角元至

正間寺壞里人金阿里修之明正德間重修隆慶丁卯木塔壞知府萬慶等修塔五層萬曆三十七年地震樓頽其角知府姜志禮知縣李待問重修

元妙觀在縣治之南唐神龍元年

建名中興觀未幾改龍興開元中改龍興爲開元而以老君祠爲龍興觀宋祥符間改天慶後改元妙併開元觀入焉

紫極宮在元妙觀之西留從効以迎恩館爲之今廢

天妃宮

在郡城德濟門內神本姓林世居莆陽之湄洲嶼父林愿天妃其第六女也生有祥光異香長能乘蓆渡海常乘雲遊島嶼人呼曰龍女宋雍熙四年九月二十九日昇化後人見朱衣飛行水上天聖間立廟莆之西山賜額曰順濟泉州建宮自宋慶元間始時羅城尙在鎮南橋內而是宮適臨浯浦之上當筍江異水二流之匯有禱輒應永樂五年使西洋太監鄭和奏令福建守鎮官重新拓之而宮宇益崇

東嶽行宮在郡城仁風門外鳳山之陽宋紹興二十一年

鼎建明萬曆三十五年地震前殿盡圯知府姜志禮建

南安縣

延福寺在九日山下晉太康時建去山二里許唐大曆三年移建今所宋乾德中陳洪進增建

乃改名曰延福

報親寺在金雞橋南宋太平興國六年建後僧廣旭募緣重建

佛跡

寺在三都唐光啟二年建今廢

報劬寺在三十九都周顯德中呂光亮捨居第建之

雙林院在五都宋崇寧三年僧師厚建今廢

惠安縣

寂光寺在縣南一都盤龍山之後卽唐王潮故宅潮歿葬于此山南唐保大間留從効建寺名

曰寂光明永樂五年僧惠日重建

宣妙寺在縣南二十九都唐天寶間里人王氏建今廢

大普安寺在縣北五都南唐保大間檢校禮部尙書江盈建今爲叢林

大福勝寺在縣南

二十五都錦田山之麓唐文德中侍郎黃納裕建元至正間僧妙峯重建

乾峯寺在縣北

觀光坊萬歲坡之麓梁貞明二年建明洪武辛亥僧南州重建

靈應寺在縣南十九都白

沙宋天禧間道人王道詢建初建時埤沙爲庵潮水齧之道詢以扇麾曰海於天地間最大豈

不能尺寸地相讓邪潮立退三尺以泥塞其衝埤遂固寺今廢

清水寺卽清水巖在崇善

里正統間建嘉靖八年災復建

龍津觀在縣治南天順四年建成化十九年道士劉時靜

重修今爲祝聖習儀之所

東嶽行宮在鳳髻山之麓每歲迎春於此

青溪宮在感化

里宣德間邑人李森建

龍僊宮在來蘇里洪武間胡氏女名僊英及笄將嫁白日飛昇次

日候山之旁現身跌坐里人異之塑像以祀

覺苑院後唐時西嶽僧樂其山水有卜居之

意僞閩王繼勳捐地建庵留鄂公廣之爲寺寺臨溪幽勝邑令陳熊顯有水落丹橫露淺沙粉

垣松桂古禪家之句

德化縣

程田寺在靈化里五代時邑人程國知施田建寺因名

戴雲寺在新化里宋端拱二年僧

懷整建

義林寺在永豐里後唐長興元年僧行豐建今廢

相安寺在新化里宋丞相

曾公亮曾留宿於此故名

龍潯寺在新化里大湖山多異花奇木靈跡勝境

五華寺

在永豐里五華山唐咸通間僧無晦建庵因坐逝邑人遂創寺塑真像祀之

香林寺在楊

梅上五代末僧守珍建

中興寺在永豐里南唐中僧行邠建

雲峯寺在小尤中園

安溪縣

雲居寺在十一都唐大中間建

雲峯寺在十六都唐乾元間里人王坤建

西峯寺在

十九都唐咸通間建

東壺寺在十六都

白雲寺在十七都唐大中間建

苦竹寺

在二十一都

東嶽行宮在十四都東渡橋東明洪武二十二年建

朝元觀在慶豐門

外宋嘉熙二年建明洪武十五年重建

同安縣

梵天寺在六輪山之阿舊名興教宋熙寧中改名梵天洪武丁巳僧無爲重建寺後爲法堂又後爲寢堂由寢堂出齋舍而東有晦翁刻戰龍松三大字于石旁有泉歷壑而下曰靈泉越壑而上則瞻亭二字倒掛於石亦晦翁書遞北而行下瞰絕壁有達夫巖三大字達夫姓名莫兼時爲同安令與張元卿黃希聖數君子同游興教寺北巖刻石紀其盛云上復有層巒疊架聳伏異形翺然翔者若鳳踔然遊者若麟擾而馴者若龍曳而伏者若龜深然而不知其止者爲虎穴從徑北躡其顛則煙火萬家峯嵐四望天風浩蕩海色蒼冥並歸一覽晦翁有隸書於石曰極目翠微之際則朱祠在焉

天興寺在佛子岡隋末莆田黃氏女結庵修行于此元泰

定間達魯花赤建爲寺今廢

智門院在人得里十一都初名南峯元至元間改智門洪武

辛亥僧法多重修

嘉福院在安人里十五都洪武辛酉僧少翁重建

真寂院在安人

里十五都夕陽山刺史王延彬建洪武辛未僧雪峯重修

普照院在嘉禾里二十二都海

島中五峯山五代僧清浩建洪武乙丑僧覺光重建

正悟院在嘉禾里二十二都海島中

五代僧徒煥建

永春縣

太平寺在十五都唐開成二年建初名龍安元至正間改額太平洪武三年重建

白馬寺

在十四都白馬山顛唐大中二年建

惠平寺在十三都唐大中間建額曰臨水宋慶曆間

重建改今名

延壽寺在八都唐大中間建宋治平中重建

護國寺在十二都

南

峯寺在十一都

梁山寺在十四都

興善寺在十四都

普濟寺在七都成化乙丑

建

巖峯寺在九都宋紹興間建

圓常寺在縣南二十八都靈瑞山後梁乾化二年僧

景墀建

金相寺在縣東二十三都龍興山下梁乾化三年僧一衲建

東嶽行宮在惠

安縣北萬歲山下洪武十八年里人張崇道重建三十五年知縣陳永年修之 報劬院初

僧清憚叅馬祖歸居于牛頭山大中初里人刑部郎中陳嘏捨地建爲請額于朝得今名

泉州府驛遞考

府縣志合載

本府 晉江縣附郭

晉安驛在府治西肅清門宋貢院地留設贍夫六十名走遞公文等夫六名

總鋪在府治前 古樓鋪 洛陽鋪二鋪俱抵本府惠安縣界

下輦鋪 雙路鋪 石龜鋪 駟行鋪 潘徑鋪以上五鋪抵同安縣界

寶月鋪 新亭鋪 白塔鋪 秀山鋪以上四鋪抵永寧衛界

山前鋪 蘇村鋪 西湖鋪 白山鋪 安平鋪 福全鋪以上六鋪抵福全所

界

府前潘徑等八鋪共司兵四十一名銀二百九十五兩二錢閏月每名加銀六錢 安平西

湖等十鋪共司兵三十名銀一百六十二兩閏月每名加銀四錢五分近奉文裁革小路鋪兵